



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa

Tribunál Distritál Dili

17 Dezembru 2014

Tribunál kondena pena prizaun tinan 10 ba kondenadu nain 3 ba krime omisídiu simples

Iha 15 Dezembru 2014, maske tama ona ba loron feriadu anual judisiál loron primeriu, Tribunál Distritál Dili kontinua marka agenda julgamentu hodi lee akordaun ba kazu krime omisídiu agravadu ne'ebé kometidu hosi arguidu na'in 10 hasoru lezadu Felisberto dos Santos (matebian). Kazu ne'e akontese iha 29 Jullu 2014, Sub-distritu Metinaro, Distritu Dili.

Tribunál kondena arguidu Alcino dos Santos, Nicodemos da Costa Oliveira no Joni da Silva ho pena prizaun tinan 10. Ba arguidu rua seluk arguidu Bernardo dos Santos no Florentino Fátima tribunál kondena ho pena prizaun tinan 1 suspende ba tinan 2 no absolve arguidu Gaspar dos Santos, Joaquim Godinho, Francisco da Costa Oliveira, Nicolão da Costa Oliveira no Romaldo dos Santos, tanba tribunál la hetan prova kona-ba sira nia involvimentu iha krime ne'e.

“JSMP hanoin katak desizaun ida ne'e bele sai hanesan lisaun di'ak ba comunidade enjeral, hodi bele evita la uza violénsia hasoru ema seluk, liuliu hodi evita hatoman-an hasai ema seluk nia vida, iha kualkér maneira,” dehan Diretór Ezekutivu JSMP, Luis de Oliveira Sampaio.

Tribunál prova katak iha 28 Jullu 2014, lezadu ho nia grupu ne'ebé partense hosi Suku Duyung ba asaltu arguidu sira iha Suku Sibuli iha Sub-distritu Metinaro, Distritu Dili. Asaun ne'e konsege hapara no atua hosi Polísia Komunitáriu Sub-distritu Metinaro. Maibé, asaltu ne'e kontinua akontese fila fali iha 29 Jullu 2014 ne'ebé hetan reasaun makas hosi arguidu Alcino dos Santos, Nicodemos da Costa Oliveira no Joni da Silva hodi rezulta lezadu mate kedas iha fatin akontesimentu.

Tribunál mós prova katak kazu ne'e akontese tanbá problema baku malu antes entre arguidu Romaldo dos Santos no lezadu (matebian) nia alin, Frederico alias “Sico” dos Santos.

Arguidu na'in tolu tribunál prova tau forsa hamutuk hodi hamate lezadu liuhosi sona ho dima dala ida ba iha lezadu nia kotuk, uza ai-tasi baku iha lezadu nia kanuruk dala rua no uza besikanu baku dala ida iha kotuk laran.

Arguidu Bernardo dos Santos no Florentino Fátima tribunál prova katak sira uza duni katana hodi baku dala rua iha lezadu nia kotuk laran no basa dala ida iha lezadu nia hasan, ne'ebé ho intensaun atu eduka. Depoisde halo tiha asaun ne'e arguidu sira fila kedas ba uma. Arguidu na'in rua lahatene arguidu nain tolu seluk oho lezadu.

Tuir mai, arguidu na'in lima seluk; Gaspar dos Santos, Joaquim Godinho, Francisco da Costa Oliveira, Nicolau da Costa Oliveira no Romaldo dos Santos, tribunál deskobre katak sira nain lima laiha koñesimentu ba kazu ne'e, tanba sira laiha fatin akontesimentu bainhira kazu ne'e akontese.

Antes ne'e, Ministériu Públiku akuza kondenadu sira kontra artigu 139 (a) Kódigu Penal kona-ba krime omisídiu agravadu. Maibé hafoin avalia faktus sira hotu, tribunál deside halo alterasaun ba kualifikasaun jurídika hosi krime omisídiu agravadu ba fali krime omisídiu simples ba kondenadu nain 3, krime ofensa ba integridade fízika simples ba arguidu nain 2 seluk, absolve ba arguidu nain 5 hosi akuzasaun Ministériu Públiku.

Atu hetan informasaun kompleitu, favor kontaktu:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org
info@jsmp.minihub.org
Telefone: 3323883 | 77295795
Website: www.jsmp.tl
Face book: www.facebook.com/timorleste.jsmp
Twitter: @JSMPtl